



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**41. Kalenderwoche – ab 11. Oktober 2009**

## Mähr ging nisch!

Ham Sie vorschn Sonnahmd ooch so gefeiod? Na, dähn Feiordaach - Daach dor Deudschn Einheid! Also mir - isch un meine Gudste - mir ham gefeiod, wie mor konndn!

Un mir kenn feiorn, wenn mir wolln! Was ham mir nisch schon alles zusammgefeiod, wenn isch da ma bloß an die Geburdsdaachsfeior von meinor Gudstn vorsches Jahr erinnorn darf! Mir ham gefeiod bis zum Abwinkn!

Un nu also hammor dähn Daach dor Deudschn Einheid zu feiorn gehabbd. Das ging dann so: Erschdema simmor bis zu Middach im Bedde gebliehm un ham geschlafn. Jedor fiehr sisch. Dann hammor uns was zu essn gekochd. Schbageddi mid Jachdwurschd un Domahdnsoße. Dann simmor widdor ins Bedde gegang un ham geschlafn bis zur Schbordschau, wo dann Fußball kam. Dann hammor Ahmdbrod gemachd un sinn vorm Fernsähor hängebliehm. Weddn das!

Nähmbei hammor zwee odor drei Flaschn Wein weggenuggld. Dann simmor irschendwann leischd angediedord widdor ins Bedde gegang. Jedor in seins. Un dann wahr der Feiordaach endlich iborschdandn!

Guhd, mir häddn ooch kenn irschendwo hinladschn kenn, wo e Gedänkschdeen schdehn dud... fiehr de Obfor dor Gneschdschafd in dor ehemalischn... odor mir häddn sogahr nach Bärln fahrn kenn... un dord häddn mir an dor ehemalischn Mauor Blum hinleeschn kenn... beschdimmd hads ooch irschendwo een Gedänkgoddesdiesd gegähm! Ganz beschdimmd - schon desweeschn, weil ja de Bfarror sozusachn de Andreibor von dor Deudschn Einheid warn. De meisdn Bfarror sinn ja dann in de Bolledig gegang un ham dord irschendwie vorgessn, wie das mid dor Näschsdliebe so

gemeend war. Die sinn dann sogahr Minisdor gewordn un so was, wos ja bloß noch nach dor Bibel gehn dud. Nee, mir häddn ooch e baar leerschdehnde Bieroräume besuchn kenn, die so nach dor Wende endschdandn sinn. Odor mir häddn ma zu die aldn Ruienen von Bedriebe im Ährzgebirge hinfahrn kenn, die immor noch in dor Gäschend rumschdehn. Abor daderzu häd mor zu lange gebrauchd. Das häd mor in vier Wochn nisch geschaffd. Guhd, de Gewärbegebiede häd mor ooch nisch geschaffd, die sich iborall neu off de Wiesn ausgebreided hamm. Wie Ungraud! Bliehende Landschafdn! Nascha, mir haddn ja schon friehor Broblehme mid Deviesn.

Un dann, dann häddn mir uns ooch ma iborleeschn kenn, was mir dazumals in dor DDR alles häddn baun kenn, wenn mir ooch soviel Schuldn gemachd häddn, wie mir jedzde ham. Das is ehm werglisch dor greeßde Bleedsinn gewähsn dazumals, dass mir immor alle bloß das ausgegähm ham, was mor erwirtschaftdn konndn. Krähdidde haddn mir keene. Mir wussdn ja nischma wie das Word geschriem wird! Heide wiss mor das. Un mir wissen ooch was eene Bleide is. Bloß, dass ehm Bankn nisch Bleide gehen derfn, das is ganz was Neues. Nee, mir ham gefeiord, wie mor konndn!

**Eduard Sachsenmeyer**